

毛

詩

禮

徵

毛詩禮徵卷第四

榮述

封建

總叙通典昔黃帝旁行天下分達萬國至于唐虞  
別爲五等曰公侯伯子男則虞書所謂輯五瑞修  
五玉是也夏與唐虞同殷制天子之田方千里公  
侯百里伯七十里子男五十里不能五十里者不  
合于天子附於諸侯周制封王者後凡有功之諸  
侯大者地方五百里侯四百里伯三百里子二百

里男百里凡諸侯世子世國大夫不世爵使人以德爵以功未賜爵視天子之元士以君其國春官

大宗伯以九儀之命正邦國之位一命受職謂列國之

士亦一命受職謂受元冕之再命受服謂受元冕之

夫再命於子男為卿卿大夫自元冕以下三命受

位謂列國之卿始有列位于王四命受器謂公之

有祭器者禮運曰大夫具官祭器不假五命賜則

聲樂皆具非禮也王之下大夫亦四命出封加一等

則者地未成國之名王之大夫四命出封加一等

五命賜以方百里二百里之地者也方三百里以

上為成國也五命六命賜官王六命之卿賜官者

中大出為子男六命賜官使得自置臣理家邑

如諸侯也。六命。七命。賜國。王之卿六命出八命。作

牧。諸侯有功德者。加命得專征伐。九命。作伯。上公

德者。加命爲二伯。得王制云。制三公一命。衮。若有

加。則賜也。三公八命矣。復加一命。則大國之君不

過九命。次國之君。不過七命。小國之君。不過五命。

大國之卿。不過三命。下卿再命。小國之卿。與下大

夫一命。春秋左氏傳說。諸侯踰年卽位。天子賜以

命。珪。公羊傳。天王使毛伯來錫公命。加魯以衮。龍

之服。傳曰。錫者。賜也。命者。加我服也。又諸侯有功

加之九錫。一曰衣服。二曰朱戶。三曰納陛。四曰輿馬。五曰樂則。六曰虎賁之士。七曰鈇鉞。八曰弓矢。九曰秬鬯。

生民卽有郤家室。傳堯見天因郤而生后稷。故國后稷于郤。命使事天以顯神順天命耳。箋堯改封于郤。

正義云鄭以姜嫄之夫先爲二王之後。是先有國。故言改封。稷成功在堯。郤必堯封。周本紀云禹封弃于郤。號曰后稷。其言不可信也。

長發元王桓撥。受小國是達。受大國是達。傳元王

契也。箋元王廣大其政始堯封之商爲小國舜之末年乃益其土地爲大國皆能達其教令。

正義云中候握河紀說堯云斯封稷契皋陶賜姓號是堯封之也考河命說舜之事云褒賜羣臣賞爵有功稷契皋陶益土地是舜益地爲大國也自殷以上大國百里握河紀注云稷契公也公卽周禮三公八命其出封加一等然則堯封契已應百里而舜又益之者以有大功特加褒賜如周賜魯衛之屬

### 右唐虞時

那我有嘉客

按此卽殷封二代後之明証也尚書稱丹朱

爲虞賓。周頌謂微子爲有客。此云嘉客一也。  
史本紀云湯封夏之後。左傳史趙對晉侯曰。  
自幕至于瞽瞍無違命。舜重之以明德。冥德  
于遂。遂世守之。注云蓋殷之興存舜之後而  
遂封。

元鳥古帝命武湯正域彼四方。方命厥後奄有九  
有。傳正長域有也。九有九州也。

王制云凡四海之內九州。州方千里。州建百里  
之國三十。七十里之國六十。五十里之國百有  
二十。凡二百一十國。名山大澤不以封。其餘以  
爲附庸。間田八州。州二百一十國。注云此大界

方三千里三三而九方千里者九也其一爲縣  
內餘八各立一州此殷法也王制又云天子之  
縣內方百里之國九七十里之國二十有一五  
十里之國六十有三凡九十三國名山大澤不  
以勝其餘以祿士以爲閒田注云畿內大國九  
者三公之田三爲有致仕者副之爲六也其餘  
三待封王之子弟次國二十一者卿之田六亦  
爲有致仕者副之爲十二又三爲三孤之田其  
餘六亦待封王之子弟小國六十三大夫之田  
二十七亦爲有致仕者副之爲五十四其餘九  
亦以待封王之子弟王制又云凡九州千七百  
七十三國天子之元士諸侯之附庸不與注云  
春秋傳曰禹會諸侯于塗山執玉帛者萬國中  
國而言萬國則是諸侯之地有方百里方七十  
里方五十里者禹承堯舜而已然矣要服之內  
地方七千里乃能容之夏末旣衰夷狄內侵諸  
侯相并土地滅國數少殷湯承之更制中國方  
三千里之界亦分爲九州而建此千七百七十



三國焉。周公復唐虞之舊域，分其五服爲九。其要服之內，亦方七千里，而因殷諸侯之數，廣其土，增其爵耳。

邦畿千里，維民所止。

按天子所居千里之地，殷周同名曰畿。夏謂之縣。王制言殷法而亦曰天子之縣者，因夏舊名名之也。千里之邑號，殷曰商邑，周曰京師。白虎通曰：京大也。師衆也。天子所居，故以大衆名之。明什倍諸侯，法日月之經千里。

右夏商時

文王文王孫子本支百世凡周之士不顯亦世箋  
其子孫適爲天子庶爲諸侯皆百世凡周之士謂  
其臣有光明之德亦得世世在位重其祿也

商之孫子其麗不億上帝旣命侯于周服

樂記云投殷之後于宋注云時武王封紂子武  
庚于殷墟所徙者微子也後周公更大而封之

韓奕溥彼韓城燕師所完以先祖受命因時百蠻  
傳韓侯之先祖武王之子也因時百蠻長是蠻服  
之百國也

按左傳云昔周公弔二叔之不咸故封建親

戚以蕃屏周下云邢晉應韓武之穆也似韓  
爲周公時攝政所封據疏自武王克商以後  
至成康之世皆未可知耳

烈文無封靡于爾邦維王其崇之念茲戎功繼序  
其皇之傳封大也靡累也崇立也戎大皇美也箋  
崇厚也皇君也無大累于汝國謂諸侯治國無罪  
惡也王其厚之增其爵土也念此大功勤事不廢  
謂卿大夫能守其職得繼世在位以其次序其君  
之者謂有大功王則出而封之

賚序大封于廟也。賚子也。言所以錫子善人也。箋  
大封。武王伐紂時。封諸臣有功者。

正義云。左傳曰。昔武王克商。光有天下。其兄弟  
之國者。十有五人。姬姓之國。四十人。古文尚書  
武成篇說。武王克殷而反。祀于宗廟。列爵惟五。  
分土惟三。大賚于四海。而萬民悅服。皆是武王  
大封之事。此言大封于廟。樂記。未至廟而已封。  
三恪二代者。言其急于先代之意。必至廟受策。  
乃成封耳。皇甫謐曰。武王伐紂之年。夏四月乙  
卯。祀于周廟。將帥之士。皆封諸侯。國四百人。兄  
弟之國。十五人。同  
姓之國。四十人。

閼宮。王曰。叔父。建爾元子。俾侯于魯。大啟爾宇。爲  
周室輔。乃命魯公。俾侯于東。錫之山川。土田附庸。

箋謂封以方七百里欲其疆於衆國王制曰名山  
大川不以封諸侯附庸則不得專臣也

正義云洛誥說周公攝政七年十有二月歸政  
其經云歲文王騂牛一武王騂牛一王命作冊  
逸視冊惟告周公其後注謂將封伯禽則是成  
王卽政之元年正月朔日封伯禽也魯爲侯封  
受上公之地可爲五百里耳明堂位封周公于  
曲阜地方七百里是于五百里之上又復加之  
附庸故注云上公之封地方五百里加魯以四  
等之附庸方百里者二十四並五五二十五積  
四十九開方之得七百里大司徒注云凡諸侯  
爲牧正帥長及有德者乃有附庸爲有祿者當  
取焉公無附庸侯附庸九同伯附庸七同子附  
庸五同男附庸三同進則取焉退則歸焉魯于  
周法不得有附庸故言錫之也

居常與許復周公之宇。**箋**許許田也。魯朝宿之邑也。常或作嘗。在薛之旁。春秋魯莊公三十一年。築臺于薛。是與周公有嘗邑。所由未聞也。六國時有孟嘗君。食邑于薛。

正義云。諸侯有大德。受采地于京師。爲將朝而宿焉。謂之朝宿之邑。魯以周公之故。成王賜之許田。春秋之時。魯不朝周。邑無所用。而許田近于鄭國。鄭有祊田。地勢之便。而與鄭易之。桓元年。鄭伯以璧假許田。公羊傳曰。許田者何。魯朝宿之邑也。此魯朝宿之邑。曷爲謂之許田。諱取周田。繫之許。近許也。

王制。方伯爲朝。天子皆有湯沐之邑。于天子之縣內。視元士。疏引異義。公羊說。諸侯朝天子。天

子之郊皆有朝宿之邑。從泰山之下皆有湯沐之邑。左氏說諸侯有功德于王室。京都有朝宿之邑。泰山有湯沐之邑。魯周公之後。鄭宣王母弟。此皆有湯沐邑。其餘則否。許慎謹案。京師之地。皆有朝宿邑。周千八百諸侯。盡京師地。不能容之。不合事理之宜。是許慎不從公羊說。鄭無所駁。當從許說。

### 右武周成王時

十月之交。作都于向。擇三有事。**箋**禮畿內諸侯二卿。

### 右厲王時

崧高序尹吉甫。美宣王也。天下復平。能建國親諸

侯褒賞申伯焉。

正義云封立謂之建。賞勞謂之親。褒賞者賜賚之名。此申伯舊國已絕。今改而大之。据其新往謝邑。是爲初建。論其舊有國土。亦爲褒崇也。

疊疊申伯。王纘之事。于邑于謝。南國是式。王命召伯。定申伯之宅。登是南邦。世執其功。

烝民。王命仲山甫。城彼東方。

漢書杜欽傳引韓詩傳云。仲山甫異姓之臣。就封于齊。

韓奕。王錫韓侯。其追其貊。奄受北國。因以其伯。實墉實壑。實畝實籍。箋韓侯之先祖微弱所受之國。



多滅絕。今復舊職。興滅國。繼絕世。故築治是城。濬修是壑。井牧是田。畝收斂是賦稅。使如故常。

江漢釐爾。主瓚秬鬯一卣。告于文人。錫山土田。于周受命。自召祖命。虎拜稽首。天子萬年。傳九命。錫主瓚秬鬯。諸侯有大功德。賜之名山土田。附庸。箋宣王欲尊賜召虎。故如岐周。使虎受山川土田之賜。命用其祖召康公受封之禮。岐周周之所起。爲其先祖之靈。故就之。

按召公封燕。元子世之。其次子亦世守采地。

守王官厲王時周召二相行政是也召穆公  
其後歟因有大功德遂于采地益之土田耳

右宣王時

終南序戒襄公也能取周地始爲諸侯受顯服大  
夫美之譜秦仲之孫襄公平王之初與兵討西戎  
以救周平王東遷王城乃以岐豐之地賜之始列  
爲諸侯遂橫有周西都宗周畿內八百里之地其  
封域東至池山在荆岐終南惇物之野

右幽平時

無衣序武公始并晉國其大夫爲之請命乎天子之使而作是詩也箋天子之使是時使來者

正義云按左傳桓八年王使立緡于晉至莊十六年王使虢公命曲沃伯以一軍爲晉侯又晉世家云哀侯二年曲沃莊伯卒晉侯緡立二十八年曲沃武公伐晉侯緡滅之盡以其寶器賂周僖王僖王命曲沃武公爲晉君列爲諸侯

### 右僖王時

瞻彼洛矣君子至止福祿如茨韎韐有奭以作六師箋君子至止者謂來受爵命者也爵命爲福賞賜爲祿此諸侯世子也除三年之喪服士服而來

未遇爵命之時。時有征伐之事。天子以其賢任爲軍將。使代卿士將六軍而出。

韞琫有珌箋。此人世子之賢者也。旣受爵命。賞賜而加賜容刀。有韞。顯其能制斷。

按王制云。諸侯世子世國。未賜爵視天子之元士。以君其國。又無衣傳曰。諸侯不命于天子。則不成爲君。白虎通曰。世子三年喪畢。上受爵命于天子。明爵者。天子之所有。臣無自爵之義。童子當受爵命者。使大夫就其國命。

之明王者不與童子爲禮也以春秋魯成公  
幼少與諸侯會不見公見之經不以爲魯耻  
明不與童子爲禮也世子上受爵命衣士服  
何謙不敢自專也故詩曰韎韐有奭謂世子  
始行也

裳裳者華左之左之君子宜之右之右之君子有  
之維其有之是以似之傳似嗣也箋維我先人有  
是二德故先王使之世祿子孫

王制云天子之縣內諸侯祿也外諸侯嗣也疏  
云此父死子祿者不在九十三國之數又云大

夫不世爵使以德爵以功注云謂縣內及列國諸侯爲大夫者不世爵而世祿避賢也

### 右世爵祿

定之方中定之方中作于楚宮揆之以日作于楚室

外傳齊語曰衛人出廬于漕桓公城楚邱以封之其畜散而無育齊桓公與之繫馬三百

揚之水序昭公分國以封沃沃盛強昭公微弱國人將叛而歸沃焉

正義云左傳惠之二十四年晉始亂故封桓叔于曲沃師服曰吾聞國家之立也本大而末小是以能固故天子建國諸侯立家今晉甸侯也而建國本既弱矣其能久乎惠之三十年晉潘

父弑昭侯而納桓叔不克  
是封桓叔于沃之事也

右私封

甘棠序美召伯也箋召伯姬姓名奭食采於召作  
上公爲二伯

旄邱序責衛伯也箋衛康叔之封爵稱侯今日伯  
者時爲州伯也周之制使伯佐牧春秋傳曰五侯  
九伯侯爲牧也

下泉郇伯勞之箋郇侯文王之子爲州伯

旱麓瑟彼玉瓚黃流在中傳九命然後錫以秬鬯

圭瓚箋殷王帝乙之時王季爲西伯以功德受此賜

正義云孔叢子云子思曰吾聞諸子夏曰殷王帝乙之時王季以九命作伯於西受圭瓚秬鬯之賜故文王因之得專征伐

右作伯

附遷國

皇矣度其鮮原居岐之陽在渭之將

正義云太王初遷已在岐山故言亦在岐山之陽是去舊都不遠也周書稱文王作程寤程典皇甫謐曰文王徙宅于程蓋謂此也箋嫌此卽是豐故云後竟徙都于豐知此非豐者以此居



岐之陽豐則岐之  
東南三百里耳

文王有聲作邑于豐箋作邑者徙都于豐以應天命

築城伊瀆作豐伊匹箋方十里曰成瀆其溝也廣  
深各八尺文王受命而猶不自足築豐邑之城大  
小適與成偶大於諸侯小於天子之制

正義云春官典命注云公之城蓋方九里侯伯  
之城蓋方七里子男之城蓋方五里坊記注云  
子男之城方五里此二注皆以公城方九里爲  
差則天子之城十二里矣故以十里爲小于天  
子也異義駁云鄭伯之城方五里又以侯伯爲  
五里者鄭兩解故書傳云古者百里之國九里

之城。七十里之國。五里之城。五十里之國。三里之城。注云。元或疑焉。周禮匠人營國。方九里。謂天子之城。今大國九里。則與之同。然則大國七里之城。次國五里之城。小國三里之城。爲近耳。或者天子實十二里。諸侯大國九里。次國七里。小國五里。是鄭兩解之事也。

維豐之垣。箋作邑於豐城之。旣成又垣之立宮室。考卜維王宅。是鎬京維龜正之。武王成之。箋考猶稽也。宅居也。稽疑之法。必契灼龜而卜之。武王卜居是鎬京之地。龜則正之。謂得吉兆。武王遂居之。篤公劉。箋公劉者。后稷之曾孫也。夏之始衰見迫。逐遷于豳。而有居民之道。

篤公劉既溥既長既景迺岡相其陰陽觀其流泉  
其軍三單度其隰原徹田爲糧度其夕陽幽居允  
荒

烝民王命仲山甫城彼東方傳東方齊也古者諸  
侯之居逼隘則王者遷其邑而定其居蓋去薄姑  
而遷于臨菑也

天作天作高山大王荒之箋高山謂岐山也書曰  
道岍及岐至于荆山天生此高山使與雲雨以利  
萬物太王自豳遷焉則能尊大之廣其德澤居之

一年成邑二年成都三年五倍其初

按諸侯遷都天子必使司空正其疆界定其都邑如召伯邑謝仲山甫城東方是也如公劉遷豳太王遷岐皆狄人迫逐之所致王命不行久矣然必先白王者而後行故白虎通云周家五遷其意一也皆欲成其道也時寧先白王者不以諸侯移必先請然後行則人臣之道也

朝宗覲遇會同

總叙通典唐虞夏氏之時四方諸侯歲一朝殷制  
五年一朝周制大行人掌大賓之禮及大客之儀  
以親諸侯春朝諸侯而圖天下之事秋覲以比邦  
國之功夏宗以陳天下之謨冬遇以協諸侯之慮  
天子當展而立諸侯北面而見天子曰覲天子當  
寧而立諸公東面諸侯西面曰朝邦畿方千里其  
外方五百里曰侯服歲一見又其外五百里曰甸  
服二歲一見又其外五百里曰男服三歲一見又  
其外五百里曰采服四歲一見又其外五百里曰

衛服五歲一見又其外五百里曰要服六歲一見九州之外謂之蕃國代一見各以其所貴寶爲贄到天子之境先謁關人關人報王王使小行人迎勞于畿又使大夫致積及郊使大行人服皮弁用璧以勞授之及國天子賜舍使司空致舍將受朝上公執桓珪九寸纁藉九寸衮冕九章其春夏朝宗各乘所受上輅建常九旒繁纓九就侯執信珪伯執躬珪七寸纁藉七寸鷩冕七章建常七旒繁纓七就子執穀璧男執蒲璧皆五寸纁藉五寸毳

冕五章建常五旂繁纓五就王則服皮弁于路門外正朝當宁而立諸侯改服于舍朝服各執瑞玉至于朝公東面諸侯西面伯子男從侯而朝末儼承命告于天子天子曰伯父實來予一人嘉之伯父其入予將受之諸侯序進入門右坐奠珪再拜稽首儼者謁侯氏坐取珪升致命王受之玉侯氏降階東北面再拜稽首儼者延之曰升升成拜乃出各還其舍司几筵設黼展于廟展前南鄉設莞席紛純加纁席畫純加次席黼純左右玉几天子

服衮冕負黼展而立諸侯裨冕一一而入以行三  
享奉束帛加璧庭實惟國所有奉束帛匹馬卓上  
九馬隨之中庭西上奠幣再拜其秋冬覲遇之時  
將朝之早諸侯裨冕釋幣于禰皆乘墨車載龍旂  
弧韜瑞玉有纁至大門外上僎自與諸侯相揖而  
入至廟門外之舍王服衮冕負斧展而受朝享之  
禮諸侯入門右皆奠玉再拜王命將受之諸侯更  
取玉升堂致命王親受之諸侯降堂又再拜稽首  
僎者延之曰升升成拜乃出然後行三享玉王皆



撫之諸侯降堂自授宰如朝宗之法覲遇之時天子不下堂其朝宗覲遇行朝享禮畢諸侯皆右肉袒于廟門之東乃入門右北面立告聽事儼者謁諸天子天子辭于侯氏曰伯父無事歸寧乃邦侯氏再拜稽首出自屏南適門西改袒還襲遂入門右北面立王乃勞之再拜稽首儼者延之日升升成拜降出王遂更延諸侯入而禮之王使宗伯以珪瓚酌鬱鬯裸之禮畢還館諸侯公卿皆就館見之若有功者天子賜以車服皆使公就館致之諸

侯迎於外門外再拜諸公奉篚服加命書于其上  
升自西階東面太史居右侯氏升西面立太史述  
命侯氏降兩階之間北面再拜稽首升成拜太史  
加書于服上侯氏受使者出侯氏送再拜時會以  
發四方之禁殷同以施天下之政其法諸侯既至  
天子之國必先朝天子於其國內然後爲壇于國  
外更行朝禮春爲壇於國東夏秋冬各於其方將  
時會殷同之朝天子乘龍載大旗象日月升龍降  
龍春拜日於東門之外夏禮日于南門之外秋禮

月與山川邱陵於西門之外冬禮月與四瀆於北

門之外加方明于壇上而祭之

方明者木也方四尺設六色東方青

南方赤西方白北方黑上元下黃

設六玉上珪下璧南方璋西方

琥北方璜東方珪以祭之去方明以朝諸侯

其朝位授

玉儋介之儀已具巡狩篇

沔水沔彼流水朝宗于海箋云興者水流而入海

小就大也喻諸侯朝天子亦猶是也諸侯春見天

子曰朝夏見曰宗

歛彼飛隼載飛載止箋云言隼欲飛則飛欲止則

止喻諸侯之驕恣欲朝不朝自由無所懼心也。  
采菽序刺幽王也。侮慢諸侯諸侯來朝不能錫命  
以禮數徵會之而無信義君子見微而思古焉。  
君子來朝何錫予之。雖無予之路車乘馬又何予  
之。元衮及黼。傳君子謂諸侯也。元衮卷龍也。白與  
黑謂之黼。箋云賜諸侯以車馬言雖無予之尚以  
爲薄及與也。元衮元衣而畫以卷龍也。黼黼黻謂  
絺衣也。諸公之服自衮冕而下侯伯自鷩冕而下  
子男自毳冕而下王之賜維用有文章者。

君子來朝言觀其旂其旂淠淠鸞聲嘒嘒載駟載駟君子所屆箋云屆極也諸侯來朝王使人迎之因觀其衣服車乘之威儀所以爲敬且省禍福也諸侯將朝於王則駟乘乘四馬而往此之服飾君子法制之極也言其尊而王今不尊也

苑柳序刺幽王也暴虐無親而刑罰不中諸侯皆不欲朝言王者之不可朝事也

韓奕四牡奕奕孔修且張韓侯入覲以其介圭入覲于王箋云諸侯秋見天子曰覲韓侯乘長大之

四牡奕奕然以時覲于宣王。覲于宣王而奉享禮。貢國所出之寶。善其尊。宣王以常職來也。

正義云。下云奄受北國。則韓侯是北方諸侯。而得秋覲王者。諸侯之朝天子。四方時節。其文不明。說周禮者。賈逵以爲一方四分之。或朝春。或覲秋。或宗夏。或遇冬。藩屏之臣。不可虛方俱行。故分趣四時助祭也。馬融以爲在東方者朝春。在南方者宗夏。在西方者覲秋。在北方者遇冬。是由經無正文。故先儒爲此二說。鄭于大宗伯大行人二注。並言分來。則是從賈之說。一方而分爲四時也。韓侯雖是北方諸侯。其在北方爲西偏。蓋于時分之使當秋覲也。箋以經再云入覲。故分之爲二。韓侯入覲爲行覲禮。入覲于王爲行享禮。行享而云介圭。則圭是爲享之物。

清廟序周公既成洛邑。朝諸侯。率以祀文王焉。

正義云此朝諸侯在明堂之上於時之位五等四夷莫不成在言率之以祀文王則朝者悉皆助祭序雖文主諸侯其實亦有四夷但四夷世乃一見助祭非常故畧而不言之耳諸侯之朝當依服數而至明堂之位得夷夏並在者以其禮樂初成將頒度量故特使俱至異于常朝也

臣工嗟嗟臣工敬爾在公王釐爾成來咨來茹箋云臣謂諸侯也釐理咨謀茹度也諸侯來朝天子有不純臣之義於其將歸也故於廟中正君臣之禮勅其諸官卿大夫云敬女在君之事王乃平理女之成功女有事當來謀之來度之於王之朝無自專

嗟嗟保介維莫之春亦又何求如何新畝箋云保介車右也月令孟春天子親載耒耜措之於參保介之御間莫晚也周之季春於夏爲孟春諸侯朝周之春故晚春遣之勅其車右以時事女歸當何求於民將如新田畚田何急其教農趨時也介甲也車右勇力之士被甲執兵也

載見載見辟王箋云諸侯始見君王謂見成王也有客有妻有且敦琢其旅箋云其來威儀萋萋且且盡心力於其事又選擇衆臣卿大夫之賢者與



之朝王言敦豕者以賢美之故王言之

烈祖約軹錯衡八鸞鶴鶴以假以享我受命溥將  
箋諸侯來助祭者乘篆轂金飾錯衡之車駕四馬  
其鸞鶴鶴然聲和言車服之得其正也以此來朝  
升堂獻其國之所有於我受政教至祭祀又溥助  
我

正義云按春官巾車之職金輅同姓以封則王  
子母弟同姓公侯乃得乘金輅耳殷禮雖亡不  
應三等之爵皆乘金輅此說諸侯  
來助獨言金輅舉其尊者言之耳

元鳥四海來假來假祁祁景員維河殷受命咸宜

百祿是何。箋云假至也。祁祁衆多也。員古文云。河之言何也。天下旣蒙王之政令皆得其所而來朝。覲貢獻。其至祁祁然衆多。其所貢於殷大至。所云維言何乎。言殷王之受命皆其宜也。百祿是何。謂當擔負天之多福。

殷武。昔有成湯。自彼氐羌。莫敢不來享。莫敢不來王。曰商是常。箋云氐羌夷狄國在西方者也。享獻也。世獻曰王。維女楚國。近在荊州之域。居中國之南方而背叛乎成湯之時。乃氐羌遠夷之國來獻。

來見曰商王是吾常君也。

天命多辟。設都于禹之績。歲事來辟。勿予禍適。稼穡匪解。箋云多衆也。來辟猶來王也。天命乃令天下衆君諸侯立都于禹所治之功。以歲時來朝觀于我殷王者。勿罪過與之禍適。徒勅以勸民稼穡。非可解倦時。楚不修諸侯之職。此所用告曉楚之義也。

右朝覲宗遇

車攻。駕彼四牡。四牡奕奕。赤芾金舄。會同有繹。傳

言諸侯來會也。諸侯赤芾金舄，舄達屨也。時見曰會。殷見曰同。繹陳也。

正義云：大宗伯注云：時見者，無常期。諸侯有不  
服者，王將有征伐之事，則既朝覲。王爲壇于國  
外，合諸侯而命事焉。殷衆也。十二歲，王如不巡  
守，則六服盡朝。朝禮既畢，王爲壇，合諸侯以命  
政焉。如是，則會同其禮各別，不得並行之矣。且  
此時王與諸侯會東都，非十二年之事。言同者，  
以會同對文，則別散則義通。會者，交會同  
者，同聚。理既是一，故論語及此連言之。

巧言，君子屢盟，亂是用長。傳：凡國有疑會同，則用  
盟而相要也。箋云：屢，數也。盟之所以數者，由世衰  
亂多相背違。時見曰會。殷見曰同，非此時而盟謂

之數。

正義云司盟職曰凡邦國有疑會同則掌其盟約之載及其禮儀北面詔明神是也

鼓鐘鼓鐘將將淮水湯湯傳幽王用樂不與德比會諸侯于淮上鼓其淫樂以示諸侯

長發受小球大球爲下國綴旒箋湯旣爲天所命則受小玉謂尺二寸圭也受大玉謂珽也長三尺執圭搢珽以與諸侯會同結定其心如旌旗之縵旒著焉

右會同

附視朝

碩人大夫夙退無使君勞傳大夫未退君聽朝于路寢夫人聽內事于正寢大夫退然後罷

雞鳴雞既鳴矣朝既盈矣傳雞鳴而夫人作朝盈而君作

正義云書傳說夫人御于君所之禮云太師奏雞鳴于階下夫人鳴玉佩于房中告去彼言告御之正法有司當以時告君此說夫人相警戒不必待告方起故自聽之也

東方明矣朝既昌矣傳東方明則夫人纚笄而朝朝已昌盛則君聽朝箋君日出而視朝

會且歸矣無庶子子憎傳會會于朝也卿大夫朝會于君朝聽政夕歸治其家事無庶子子憎無見惡于夫人

東方未明東方未明顛倒衣裳箋云挈壺氏失漏刻之節東方未明而以為明故羣臣促遽顛倒衣裳羣臣之朝別色始入

羔裘羔裘消搖狐裘以朝傳羔裘以游燕狐裘以適朝箋云諸侯之朝服緇衣羔裘大蜡而息民則有黃衣狐裘今以朝服燕祭服朝是其好絮衣服

也。先言燕，後言朝，見君之志不能自強于政治。

庭燎美宣王也。因以箴之。箋云：諸侯將朝，宣王以夜未央之時，問夜早晚。美者，美其能自勤以政事。因以箴者，王有雞人之官，凡國事爲期，則告之以時。王不正其官而問夜早晚。

夜如何？其夜鄉晨。庭燎有輝。君子至止。言觀其旂。箋云：晨明也。上二章聞鸞聲爾。今夜鄉明，我見其旂。是朝之時也。朝禮別色始入。

聘問



總叙通典周制諸侯遣使聘天子皆以卿爲使大夫爲上介士爲衆介將行朝服釋幣于禰告爲君使然後釋幣于行介及衆介皆從遂受命于朝受聘珪享束帛加璧遂行至天子畿更張壇先謁關人報王使請事遂導以入王使大夫授館遣人致殮將行聘之前皆遣人授舍于文王廟門外行聘之朝釋幣于禰服冕服乘車建旂至大門外下車王服皮弁服受聘受訖王更服服衮冕入廟當展而立賓入次改服裨冕而入士介皆從賓後入行

享于廟亦升堂進玉王前撫之亦行三享王禮之  
出廟門更行私覲之見王出至大門內使問其君  
及勞聘賓還館主人致饗餼明日發幣于公卿然  
後受享受燕而還王亦使送出境若諸侯相聘之  
制則比年小聘三年大聘相勵以禮則外不相侵  
內不相陵此天子所以養諸侯兵不用而諸侯自  
爲正之具也以圭璋聘重禮也已聘而還珪璋此  
輕財重禮之義也諸侯相勵以輕財重禮則人皆  
讓矣

下泉四國有王。郇伯勞之。傳。郇伯。郇侯也。諸侯有事。二伯述職。箋。云有王。謂朝聘于天子也。郇侯。文王之子。爲州伯。有治諸侯之功。

四牡。四牡駢駢。周道倭遲。傳。文王率諸侯撫叛國而朝聘乎紂。故周公作樂以歌文王之道爲後世法。

皇皇者華。序君遣使臣也。

按小大雅譜正義云。皇皇者華。君遣使臣。是聘問鄰國也。

縣肆不殄厥愠亦不隕厥問柞棫拔矣行道兌矣  
箋云小聘曰問柞樂也棫白桤也文王見太王立  
冢土有用大衆之義故不絕去其恚惡惡人之心  
亦不廢其聘問鄰國之禮今以柞棫生柯葉之時  
使大夫將師旅出聘問其行道士衆兌然不有征  
伐之意

正義云定四年左傳云嘉好之事君行師從卿  
行旅從則臣之出聘止應將旅而已而云師者  
以其下說混夷畏之則非徒一旅之衆混夷是  
周之敵讐文王使臣過其旁而聘問遠國明其  
不敢輕行故  
師旅並言之

饗食燕禮

總叙通典周制諸侯入朝王使小行人迎勞于畿及郊大行人勞視館將幣爲承而饋掌客致禮上公五積殮五牢牽五牢朝訖則致饗餼九牢侯伯四積殮五牢牽四牢饗餼七牢子男三積殮三牢牽三牢饗餼五牢殷膳皆太牢以及歸上公三食三饗三燕侯伯再食再饗再燕子男一食一饗一燕若弗酌則以幣致之凡介行人宰史皆有殮饗餼以其爵等爲牢禮之陳數唯上介有禽獻

按天子饗食燕禮皆亡儀禮燕禮言諸侯燕羣臣及聘問之禮公食大夫禮言主國君以禮食小聘大夫之禮通典未詳其節次今約舉之于左

燕禮小臣戒與者膳宰具官饌于寢東司宮筵賓于戶西小臣設公席于阼階上西鄉公升卽位于席小臣納卿大夫射人請賓公曰命某爲賓射人命賓賓出小臣請執冪者與羞膳者膳宰請羞于諸公卿者射人納賓賓入及庭公降一等揖之公

升就席賓升自西階主人亦升自西階賓右北面

至再拜賓答再拜

主人宰夫也

主人降洗升酌膳筵前

獻賓賓西階上拜筵前受爵反位膳宰薦脯醢賓

升筵膳宰設折俎賓以虛爵降洗升酌膳酢主人

于西階上主人盥洗象觚升實之東北面獻于公

士薦醢醢膳宰設折俎主人更爵洗升酌膳以降

酢于阼階下卒爵奠爵于篚升媵觚于賓酌散遂

飲降洗酌膳酬賓賓奠于薦東小臣請媵爵者下

大夫二人媵爵升酌散遂飲媵爵者洗象觶升實

豐以進賓坐祭遂飲奠于豐上

飲漱也

公受宰夫束

帛以侑西鄉立賓降辭幣升聽命降拜公辭升再拜稽首受幣執庭實以出上介受賓幣從者訝受皮賓入門左北面再拜稽首公辭升再拜稽首公揖退于廂賓卒食會飯三飲取梁與醬以降東面再拜稽首公降再拜介逆出賓出公送于大門內再拜賓不顧有司卷三牲之俎歸于賓館魚腊不與明日賓朝服拜賜于朝拜食與侑幣皆再拜稽首



卷耳我姑酌彼金罍維以不永懷箋云我我君也臣出使功成而反君且當設饗燕之禮與之飲酒以勞之我則以是不復長憂思也

我姑酌彼兕觥維以不永傷箋觥罰爵也饗燕所以有之者禮自立司正之後旅酬必有醉而失禮者罰之亦所以爲樂

正義云知饗有觥者七月云朋酒斯饗稱彼兕觥成十四年左傳衛侯饗苦成叔甯惠子引詩云兕觥其觥旨酒思柔故知饗有觥也饗以訓恭儉不應醉而用觥者饗禮之初示敬故酒清而不敢飲肉乾而不敢食其末亦如燕法鄉飲酒大夫之饗禮亦有旅酬無算爵則饗末亦有

旅酬恐其失禮故用觥也。知燕亦有觥者。昭元年左傳鄭人燕趙孟穆叔子皮及曹大夫與拜舉兕爵是燕有兕觥也。鄉飲酒禮無觥者說行禮不言其有過之事故也。

七月朔酒斯饗曰殺羔羊躋彼公堂稱彼兕觥萬壽無疆。箋云十月民事男女俱畢無飢寒之憂國君閒于政事而饗羣臣於饗而正齒位故因時而誓焉飲酒既樂欲大壽無竟是謂豳頌。

正義云月令孟冬云是月也大飲烝。注云十月農功畢天子諸侯與羣臣飲酒于太學以正齒位謂之大飲別之于燕其禮亡。烝謂折牲體升為俎引此詩十月滌場以下云是豳頌大飲之詩是鄭以天子諸侯自有大饗羣臣之禮故不為鄉飲酒也言別于燕禮燕禮小于大飲燕禮

上設六尊此言朋酒者設尊之法每兩尊並設故云朋耳非謂國君大飲唯兩尊也燕禮司官尊于東楹之西兩方壺公尊瓦大士尊兩圓壺是尊皆兩兩對設之也按燕禮記云其牲狗此大飲大于燕禮故用羊也

伐柯我覲之子籩豆有踐箋云王欲迎周公當以饗燕之饌行至則歡樂以說之

彤弓序天子錫有功諸侯也

鐘鼓既設一朝饗之箋云大飲賓曰饗一朝猶早朝

正義云周語曰王饗有體薦燕有折俎公當饗卿當燕是其禮盛也言一朝者言王殷勤于賓

早朝而卽行禮故云一朝猶早朝以燕或至夜  
饗則如其獻數禮成而罷故以朝言之昭元年  
左傳云鄭饗趙孟禮終  
乃燕是饗不終日也

鐘鼓旣設一朝右之箋云右之者主人獻之賓受  
爵奠于薦右旣祭俎乃席末坐卒爵之謂也

鐘鼓旣設一朝醕之箋云飲酒之禮主人獻賓賓  
酢主人主人又飲而酌賓謂之醕醕猶厚也勸也  
吉日以御賓客且以酌醴傳饗醴天子之飲酒也  
箋云御賓客者給賓客之御也賓客謂諸侯也酌  
醴酌而飲羣臣以爲俎實也

采菽采菽采菽筐之筥之箋云菽大豆也采之者  
采其葉以爲藿三牲牛羊豕芼以藿王饗賓客有  
牛俎乃用鉶羹故使采之

膾沸檻泉言采其芹箋云言我也芹菜也可以爲  
菹亦所用待君子也

公劉篤公劉于京斯依陰陰濟濟俾筵俾几既登  
乃依乃造其曹執豕于牢酌之用匏食之飲之君  
之宗之箋厚乎公劉之居於此京依而築宮室其  
旣成也與羣臣士大夫飲酒以落之羣臣則相使

爲公劉設几筵使之升坐公劉旣登堂負展而立羣臣適其牧羣搏豕于牢中以爲飲酒之殽酌酒以匏爲爵言忠敬也宗尊也公劉雖去邠國來遷羣臣從而君之尊之猶在邠也

正義云饗禮當烹太牢以飲賓此唯用豕者公劉新至幽地殺禮也

### 右饗禮

權輿於我乎每食四簋傳四簋黍稷稻粱

正義云案公食大夫禮云宰夫設黍稷六簋又云宰夫授公梁公設之宰夫膳稻于梁西注云膳猶進也進稻梁者以簋此云四簋黍稷稻粱者以詩言每食四簋稱君禮食大具則宜每器

一物不應以黍稷二物分爲四簋以公食大夫  
禮有稻有粱知此四簋之內兼有稻粱公食大  
夫之禮是主國之君與聘客禮食備設器物故  
稻粱在簋公食大夫黍稷六簋猶有稻粱此唯  
四簋者亦燕食  
差于禮食也

角弓如食宜飶如酌孔取箋云王如食老者則宜  
令之飽如飲老者則當孔取孔取謂度其所勝多  
少凡器之孔其量大小不同老者氣力弱故取義  
焉王有族食族燕之禮

正義云文王世子云若公與族人燕則以異姓  
爲賓膳宰爲主人族食世降一等大傳云綴之  
以食而弗殊是王有  
族食族燕之禮也

右食禮

女曰雞鳴將翔將翔弋鳧與雁箋云弋繳射也言無事則往弋射鳧雁以待賓客爲燕具

弋言加之與子宜之箋云言我也子謂賓客也所弋之鳧雁我以為加豆之實與君子共有也

正義云曲禮云凡進食之禮右肴左載食居人之左羹居人之右膾炙處外醯醬處內蔥藻處末酒漿處右注云此大夫士與賓客燕食之禮其禮食則宜倣公食大夫禮云又案公食大夫禮皆無用鳧雁之文此得用鳧雁者公食大夫自是食禮此則飲酒彼以正禮而食此以相好私燕其饌不得同也



知子之來之雜佩以贈之箋云贈送也我若知子之必來我則豫儲雜佩去則以送子也與異國賓客燕時雖無此物猶言之以致其厚意其若有之固將行之士大夫以君命出使主國之臣必以燕禮樂之助君之歡

鹿鳴序燕羣臣嘉賓也既飲食之又實幣帛筐篚以將其厚意然後忠臣嘉賓得盡其心矣箋飲之而有幣酬幣也食之而有幣侑幣也

正義云此飲謂饗也郊特牲云飲養陽氣故饗禘有樂是饗有飲其幣所用公食大夫用束帛

以侑其酬幣則無文聘禮注云酬幣饗禮酬賓  
勸酒之幣所用未聞禮幣用束帛乘馬亦不是  
過謂聘享止用束帛乘馬侑幣又用束帛故云  
亦不是過言諸侯于大夫酬幣不過是也其天  
子酬諸侯及諸侯自相酬仍不必用束帛乘馬  
故聘禮注又引禮器云琥璜爵蓋天子酬諸侯  
也謂饗時酬賓以琥璜將幣耳小行人合六幣  
琥以繡璜以黼則天子酬諸侯以黼繡而琥璜  
將之既天子饗諸侯之酬幣與諸侯異則食禮  
天子侑諸侯其幣不必束帛無文以言之燕禮  
亦當有幣但今燕禮唯有好貨無幣故文不顯  
言之又云言既飲食之則饗食並有獨言燕  
羣臣者以食禮無酒樂饗禮訓恭儉非於臣子  
忻樂故叙以燕目之  
而後兼言饗食也

常棣序燕兄弟也

饋爾籩豆飲酒之飫兄弟既具和樂且孺傳饋陳  
飫私也不脫屨升堂謂之飫九族會曰和孺屬也  
王與親戚燕則尚毛箋云私者圖非常之事若議  
大疑于堂則有飫禮焉聽朝爲公九族從已上至  
高祖下至元孫之親也屬者以昭穆爲次序

正義云周語有王公立飫又曰立成禮烝而已  
飫大于燕此詩飫燕維陳此章之中兼燕禮矣

妻子好合如鼓琴瑟箋云王與族人燕則宗婦內  
宗之屬亦從后于房中

正義云同姓大夫之婦名爲  
宗婦同姓之女名爲內宗

伐木序燕朋友故舊也。

伐木許許。醴酒有藇。既有肥羜。以速諸父。寧適不來。微我弗顧。於粲灑掃。陳饋八簋。傳許許。柿貌。以筐曰醴。以藪曰湑。與美貌。羜。未成羊也。天子謂同姓諸侯。諸侯謂同姓大夫。皆曰父。異姓則稱舅。國君友其賢臣。大夫士友其宗族之仁者。粲。鮮明貌。圓曰簋。天子八簋。箋有酒有羜。今以召族人飲酒。粲然已灑。攢矣。陳其黍稷矣。謂爲食禮。

正義云此有酒有羜。召族人飲之。蓋是燕禮。非饗也。聘禮注云饗謂烹太牢以飲賓也。今此唯

肥斂而已是非饗禮明矣。今燕禮者是諸侯燕其羣臣及賓客之禮。禮記云其牲狗不用羊豕。此云有肥斂者。天子之禮異于諸侯也。掌客職五等諸侯。簋皆十二。又公食大夫禮。上大夫八簋。此天子云八簋者。据待族人設食之禮。其掌客所云。謂殮饗簋之大禮。公食大夫是諸侯食大夫之禮。若曰食特牲者。二簋少牢者。四簋故玉藻云。少牢五俎。四簋。然則太牢者六簋。上肥斂。釃酒謂燕禮。此是食禮。互陳之也。知是食禮者。燕禮主于飲酒。無飯食。則此簋盛黍稷是食禮可知。燕言諸父食言諸舅。互文以相通也。推此明以兼有饗矣。但文不見饗耳。

南有嘉魚。君子有酒。嘉賓式燕以樂。箋云。君子斥時在位者也。式用也。用酒與賢者燕飲而樂也。

蓼蕭。既見君子。我心寫兮。燕笑語兮。是以有譽處。

分箋云既見君子者遠國之君朝見于天子也我心寫者舒其情意無留恨也天子與之燕而笑語則遠國之君各得其所是以稱揚德美使聲譽常處天子

既見君子倬革冲冲和鸞離離萬福攸同箋云此說天子之車飾者諸侯燕見天子天子必乘車迎于門是以云然攸所也

正義云王唯覲禮不下堂而見諸侯耳其朝宗當迎之故大行人說車迎之法賓主步數彼六服諸侯尚有車迎則四夷之君車迎可知又鄭注下曲禮以春夏受贄于朝受享于廟以生氣

文也。秋冬一受之于廟，殺氣質也。鄭又以覲禮不出迎，諸侯則冬遇亦不迎，然則秋冬燕見亦無出迎之法也。

湛露序天子燕諸侯也。箋燕謂與之燕飲酒也。諸侯朝覲會同，天子與之燕，所以示慈惠。

湛湛露斯，匪陽不晞。厭厭夜飲，不醉無歸。傳厭厭安也。夜飲燕私也。宗子將有事，則族人皆侍，不醉而出，是不親也。醉而不出，是渫宗也。箋云興者露之在物，湛湛然使物柯葉低垂，喻諸侯受燕爵其義有似醉之貌。諸侯旅酬之則猶然，唯天子賜爵。

則貌變肅敬承命有似露見日而晞也。天子燕諸侯之禮亡。此假宗子與族人燕爲說爾。族人猶羣臣也。其醉不出不醉而出猶諸侯之義也。飲酒至夜猶云不醉無歸。此天子於諸侯之義。燕飲之禮。宵則兩階及庭門皆設大燭焉。

湛湛露斯在彼豐草。厭厭夜飲在宗載考。傳夜飲必於宗室。箋云豐草喻同姓諸侯也。載之言則也。考成也。夜飲之禮在宗室同姓諸侯則成之。於庶姓其讓之則止。昔者陳敬仲飲桓公酒而樂桓公。



命以火繼之。敬仲曰：臣卜其晝，未卜其夜。于是止。此之謂不成也。

湛湛露斯，在彼杞棘。顯允君子，莫不令德。箋云：杞也。棘也。異類。喻庶姓諸侯也。令善也。無不善其德。言飲酒不至于醉。

其桐其椅，其實離離。豈弟君子，莫不令儀。箋云：桐也。椅也。同類而異名。喻二王之後也。其實離離，喻其薦俎禮物多于諸侯也。飲酒不至于醉，徒善其威儀而已，謂陔節也。

正義云燕禮賓醉北面坐取其薦脯以降奏陔  
夏天子燕諸侯之禮亡故据燕禮以况之二王  
之後燕罷而出  
不必奏陔夏

六月吉甫燕喜既多受祉來歸自鎬我行永久飲  
御諸友魚鼈膾鯉箋云吉甫既伐玁狁而歸天子  
以燕禮樂之則歡喜矣又多受賞賜也御侍也王  
以吉甫遠從鎬地來又日月長久今飲之酒使其  
諸友恩舊者侍之又加其珍美之饌所以極勸之  
也

頍弁有頍者弁實維伊何爾酒既旨爾殽既嘉箋

云實猶是也。言幽王服是皮弁之冠，是維何爲乎？言其宜以宴而弗爲也。禮天子諸侯朝服以宴，天子之朝，皮弁以日視朝，旨嘉皆美也。女酒已美矣，女殽已美矣，何以不用與族人燕也？言其知具其禮而弗爲也。

賓之初筵。賓之初筵，溫溫其恭。箋云：此復言初筵者，旣祭王與族人燕之筵也。王與族人燕以異姓爲賓。

三爵不識，矧敢多又。箋云：三爵者，獻也，酬也，酢也。

行葦戚戚兄弟莫遠具爾或肆之筵或授之几箋  
爾謂進之也王與族人燕兄弟之親無遠無近俱  
揖而進之年稚者爲設筵而已老者加之以几

正義云燕禮曰公降立于阼階之東南南鄉適  
卿西面北上適大夫皆少進注云適近也揖而  
移之近  
之是也

肆筵設席授几有緝御或獻或酢洗爵奠斚傳設  
席重席也緝御踧踏之容也斚爵也夏曰醖殷曰  
斚周曰爵箋云緝猶續也御侍也兄弟之老者旣  
爲設重席授几又有相續代而侍者謂敦史也進

酒于客曰獻。客答之曰酢。主人又洗爵酬客。客受而奠之不舉也。用殷爵者尊兄弟也。

有馱振振鷺鷺于下。鼓咽咽。醉言舞。于胥樂兮。箋  
云于於胥皆也。僖公之時。君臣無事。則相與明義明德而已。潔白之士羣集于君之朝。君以禮樂與之飲酒。以鼓節之。咽咽然。至於無算爵。則又舞燕樂以盡其歡。君臣於是則皆喜樂也。

右燕禮

附殯禮

大東有饌簋殽有捄棘七箋云殽者客始至之大禮也凡殽饗餼以其爵等爲之牢禮之數陳

### 軍旅

總叙通典周制大司馬制軍詰禁以糾邦國若大  
師則掌其戒令蒞太卜帥執事蒞釁主及軍器及  
致建太常比軍衆誅後至者司兵掌五兵五盾及  
授兵從司馬之法以頒之司戈盾掌戈盾之物而  
頒之授二車戈盾建乘車之戈盾授旅賁及虎士  
之戈盾車行兵車不式武車綏旌

德美在內  
故結旌凡軍

旅會同合其車之卒伍而比其乘屬其右戎僕掌

馭戎車掌倅車之政

倅副也

正其服犯軼如玉輅之

儀虎賁氏掌先後王而趨以卒伍旅賁氏掌執戈  
盾夾王車而趨左八人右八人車止則持輪太僕  
則自左馭而前驅及贊王鼓前有水則載青旌前  
有塵埃則載鳴鳶前有車駟則載飛鴻前有士師  
則載虎皮前有摯獸則載貔貅行前朱鳥而後元  
武左青龍而右白虎招搖在上急繕其怒進退有  
度挈壺氏掌挈壺以令軍井挈轡以令舍挈畚以

令糧番所以盛糧之器故以番表稟凡軍事懸壺以序聚櫟及戰

司馬巡陣視事而賞罰若師有功則左執律右秉鉞以先愷樂獻于社若師不功則厭而奉主車王弔勞士庶子則相

大明殷商之旅其會如林矢于牧野維予侯興傳旅衆也如林言衆而不爲用也矢陳興起也言天下之望周也

維師尚父時維鷹揚涼彼武王肆伐大商會朝清明傳師太師也尚父可尚可父鷹揚如鷹之飛揚



也涼佐也肆疾也會甲也不崇朝而天下清明

文王有聲序繼伐也武王能廣文王之聲卒其伐功也箋繼伐者文王伐崇而武王伐紂

武嗣武受之勝殷遏劉耆定爾功箋云遏止耆老也嗣子武王受文王之業舉兵伐殷而勝之以止天下之暴虐而殺人者年老乃定女之此功言不汲汲于誅紂須暇五年

闕宮致天之屈于牧之野箋屈極也文王武王繼太王之事至受命致太平天所罰極于商郊牧野

右革命

免爰序閔周也桓王失信諸侯背叛構怨連禍王師傷敗君子不樂其生焉

正義云桓五年左傳曰王奪鄭伯政鄭伯不朝傳又曰秋王以諸侯伐鄭戰于繻葛王卒大敗

東山序周公東征也周公東征三年而歸勞歸士大夫美之故作是詩也箋成王既得金縢之書親迎周公周公歸攝政三監及淮夷叛周公乃東伐之三年而後歸耳

制彼裳衣勿士行枚箋云勿猶無也女制彼裳衣

而來謂兵服也。亦初無行陳銜枚之事。言前定也。  
春秋傳曰。善用兵者不陳。

破斧。周公東征。四國是皇。傳四國管蔡商奄也。皇  
匡也。

六月序宣王北伐也。

正義云毛意上四章說王自親行。下二章說王  
還之後遣吉甫行也。故三章再言薄伐。上謂王  
伐之下。謂吉甫伐之也。鄭  
以爲獨遣吉甫。王不自行。

六月棲棲。戎車旣飭。四牡騤騤。載是常服。傳棲棲  
簡閱貌。箋云記六月者。盛夏出兵。明其急也。

比物四驪閑之維則維此六月既成我服我服既成于三十里傳物毛物也則法也言先教戰然後用師師行三十里

玁狁匪茹整居焦穫侵鎬及方至于涇陽傳焦穫周地接于玁狁者

元戎十乘以先啟行箋可以先前啟突敵陳之前行

采芑序宣王南征也

方叔率止鉦人伐鼓陳師鞠旅傳伐擊也鉦以靜

之鼓以動之。鞠告也。箋云鉦也。鼓也。各有人焉。言鉦人伐鼓。互言爾。二千五百人爲師。五百人爲旅。此言將戰之日。陳列其師旅。誓告之也。陳師告旅。亦互言之。

顯允方叔。伐鼓淵淵。振旅闐闐。箋云伐鼓淵淵。謂戰時進士衆也。至戰止將歸。又振旅伐鼓。闐闐然振猶止也。旅衆也。春秋傳曰。出曰治兵。入曰振旅。其禮一也。

祈父。祈父。子王之爪牙。胡轉予于恤。靡所止居。傳

祈父司馬也。職掌封圻之兵甲。恤憂也。宣王之末  
司馬失職。姜戎爲敗。**箋**此勇力之士。責司馬之辭  
也。我乃王之瓜牙。瓜牙之士。當爲王閑守之衛。女  
何移我于憂。使我無所止居乎。謂見使從軍與羌  
戎戰于千畝而敗之時也。六軍之士。出自六卿。法  
不取于瓜牙之士。

正義云。周語云。宣王三十九年。戰  
于千畝。王師敗績于姜氏之戎。

瞻彼洛矣。韎韐有奭。以作六師。**傳**天子六軍。**箋**云  
此諸侯世子也。除三年之喪。服士服而來。未遇爵

命之時時有征伐之事天子以其賢任爲軍將使  
代卿士將六軍而出

采菽序刺幽王也侮慢諸侯諸侯來朝不能錫命  
以禮數徵會之而無信義君子見微而思古焉

正義云周本紀云褒姒不好笑幽王爲烽燧大鼓有寇至則舉烽火諸侯悉至至而無寇褒姒乃大笑幽王之廢申后去太子申侯怒乃與繒西夷犬戎共攻幽王幽王舉烽火徵兵兵莫至遂殺幽王驪山下盡取周賂而去是義事不信見伐無救之事

漸漸之石序下國刺幽王也戎狄叛之荆舒不至  
乃命將帥東征役久病在外故作是詩也

武人東征，不皇朝矣。**箋**云：武人謂將帥也。皇，正也。將率受王命東行而征伐，役人罷病，必不能正荆舒使之朝于王。

**茗之華序**，大夫閔時也。幽王之時，西戎東夷交侵中國，師旅並起，因之以饑饉，君子閔周室之將亡，傷已逢之，故作是詩也。

**何草不黃序**，下國刺幽王也。四夷交侵，中國背叛，用兵不息，視民如禽獸，君子憂之，故作是詩也。

**抑修爾車馬**，弓矢戎兵，用戒戎作，用遏蠻方。**箋**此



時中國微弱，故復戒將率之臣，以治軍實。女當用此脩兵事之起，用此治九州之外不服者。

桑柔四牡騤騤，旗旐有翩。亂生不夷，靡國不泯。箋云：軍旅久出征伐，而亂日生，不平，無國而不見殘滅也。言王之用兵，不得其所，適長寇虐。

江漢序尹吉甫美宣王也，能興衰撥亂，命召公平淮夷。

常武赫赫明明，王命卿士。南仲太祖，太師皇父。整我六師，以修我戎。傳王命南仲於太祖，皇甫爲太

師箋云南仲文王時武臣也顯著乎昭察乎宣王之命卿士爲大將也乃用其以南仲爲太祖者今太師皇父是也使之整齊六軍之衆治其兵甲之事命將必本其祖者因有世功於是尤顯大師公兼官也

王謂尹氏命程伯休父左右陳行戒我師旅率彼淮浦省此徐土傳尹氏掌命卿士程伯休父始命爲大司馬浦涯也箋云尹氏天子世大夫也率循也王使大夫尹氏策命程伯休父于軍將行治兵

之時使其士衆左右陳列而勅戒之使循彼淮浦  
之旁省視徐國之土地叛逆者軍禮司馬掌其誓  
戒。

王奮厥武如震如怒進厥虎臣闕如虢虎鋪敦淮  
濱仍執醜虜。

王旅嘽嘽如飛如翰如江如漢如山之苞如川之  
流。**箋**云嘽嘽閒暇有餘力之貌其行疾自發舉如  
鳥之飛也翰其中豪俊也江漢以喻盛大也山本  
以喻不可驚動也川流以喻不可禦也。

長發韋顧既伐昆吾夏桀。箋云韋豕韋彭姓也顧昆吾皆已姓也三國黨于桀惡湯先伐韋顧克之昆吾夏桀則同時誅也。

殷武撻彼殷武奮伐荆楚。采入其阻哀荆之旅。傳撻疾意也殷武殷王武丁也荆楚荊州之楚國也采深哀聚也箋云有鐘鼓曰伐采冒也殷道衰而楚人叛高宗撻然奮揚威武出兵伐之冒入其險阻謂踰方城之隘克其軍率而俘虜其士衆。

右王師征伐

旄丘序責衛伯也。狄人迫逐黎侯，黎侯寓于衛，衛不能修方伯連率之職，黎之臣子以責于衛也。狐裘蒙戎，匪車不東。箋云：刺衛諸臣形貌蒙戎，然但爲昏亂之行，女匪有戎車乎？何不來東迎我君而復之。

褰裳序思見正也。狂童恣行，國人思大國之正己也。

子惠思我，褰裳涉溱。箋云：子者，斥大國之正卿。子若愛而思我，我國有突篡國之事，而可征而正之。

我則揭衣渡溱水往告難也。

械櫟周王于邁六師及之箋周王往行謂出兵征伐也。二千五百人爲師。今王興師行者殷末之制未有周禮。周禮五師爲軍。軍萬二千五百人。

正義云鄭之此言未是定說。鄭志趙商問此箋引常武整我六師。宣王之時。又此征伐之事。不稱六軍而稱六師。不達其意。答曰。師者衆之通名。故人多云焉。欲著其大數。則乃言軍耳。此正答常武而不申此箋之意。是其自持疑也。

皇矣密人不共。敢距大邦。侵阮徂共。王赫斯怒。爰整其旅。以按徂旅。以篤于周祜。以對于天下。傳國

有密須氏侵阮遂往侵共旅師按止也旅地名也對遂也箋云阮也徂也共也三國犯周而文王伐之密須之人乃敢距其義兵違正道是不直也赫怒意斯盡也五百人爲旅對答也文王赫然與其羣臣盡怒曰整其軍旅而出以却止徂國之兵衆以厚周當王之福以答天下鄉周之望

正義云毛以徂爲往故云侵阮遂往侵共以阮共爲周地爲密須所侵鄭以上言四國于此宜爲國名下云徂旅則是徂國師衆故以阮徂共三者皆爲國名與密須而四也

依其在京侵自阮彊陟我高岡無矢我陵我陵我

阿無飲我泉我泉我池傳京大阜也矢陳也箋云  
京周地名陟登也矢猶當也大陵曰阿文王但發  
其依居京地之衆以往侵阮國之疆登其山脊而  
望阮之兵兵無敢當其陵及阿者又無敢飲食于  
其泉及池水者小出兵而令驚怖如此此以德攻  
不以衆也陵泉重言者美之也每言我者据後得  
而有之而言

正義云毛以爲密人不義來侵周人  
怒伐之意鄭以爲文王往侵阮國

臨衝閑閑崇墉言言執訊連連攸馘安安是類是



禍是致是附。四方以無侮。傳閑閑動搖也。言言高大也。連連徐也。攸所也。馘獲也。不服者殺而獻其左耳曰馘。於內曰類。於野曰禍。致致其社稷羣神附附其先祖爲之立後。尊其尊而親其親。

維清維清緝熙。文王之典。箋云緝熙光明也。天下之所以無敗亂之政而清明者。乃文王有征伐之法故也。文王受命七年五伐也。

正義云。文王七年五伐。卽尚書傳所云二年伐  
邦三年伐密須。四年代犬夷。五年伐耆。六年代  
崇是也。

右方伯征伐

伯兮序刺時也言君子行役爲王前驅過時而不反焉箋云衛宣公之時蔡人衛人陳人從王伐鄭爲王前驅久故家人思之

伯兮揭兮邦之桀兮傳伯州伯也揭武貌桀特立也箋云伯君子字也桀英桀言賢也

伯也執殳爲王前驅

無衣序刺用兵也秦人刺其君好攻戰亟用兵而不與民同樂焉

王于興師修我戈矛與子同仇傳天下有道則禮樂征伐自天子出仇匹也

右諸侯從王征伐

擊鼓序怨州吁也衛州吁用兵暴亂使公孫文仲將而平陳與宋國人怨其勇而無禮也

擊鼓其鏜踴躍用兵箋云此用兵謂治兵時

爰居爰處爰喪其馬于以求之于林之下傳有不還者有亡其馬者箋云于於也求不還者及亡其馬者當於山林之下軍行必依山林求其故處近

得之。

雄雉序刺衛宣公也。淫亂不恤國事。軍旅數起。大  
夫久役。男女怨曠。國人患之。而作是詩。

清人序刺文公也。高克好利而不顧其君。文公惡  
而欲遠之。不能。使高克將兵而禦狄于竟。陳其師  
旅。翱翔河上。久而不召。衆散而歸。高克奔陳。公子  
素惡高克。進之不以禮。文公退之不以道。危國亡  
師之本。故作是詩也。

正義云。春秋閏公二年冬  
十二月。狄入衛。鄭棄其師。

左旋右抽中軍作好傳左旋講兵右抽抽矢以射  
居軍中爲容好箋云左左人謂御者右軍右也中  
軍謂將也高克之爲將久不得歸日使其御者習  
旋車車右抽刃自居中央爲軍之容好而已兵車  
之法將居鼓下故御者在左

鵠羽序刺時也昭公之後大亂五世君子下從征  
役不得養其父母而作是詩也

葛生序刺晉獻公也好攻戰則國人多喪矣

小戎序美襄公也脩其兵甲以討西戎西戎方彊

而征伐不休。國人則矜其車甲。婦人能閔其君子焉。

泮水矯矯虎臣。在泮獻馘。淑問如臯陶。在泮獻囚。  
**箋**云。矯矯武貌。馘所格者之左耳。淑善也。囚所虜  
獲者。僖公旣伐淮夷而反在泮宮。使武臣獻馘。又  
使善聽獄之吏如臯陶者。獻囚。言伐有功。所任得  
其人。

角弓其觶。束矢其搜。戎車孔博。徒御無數。旣克淮  
夷。孔淑不逆。**箋**云。角弓觶然。言持弦急也。束矢搜

然言勁疾也。博當作傳。甚傳致者言安利也。徒行者御車者皆敬其事。又無厭倦也。僖公以此兵衆伐淮夷而勝之。其士卒甚順軍法而善。無有爲逆者。謂堙井刊木之類。

閔宮戎狄是膺。荆舒是懲。則莫我敢承。箋云懲艾也。僖公與齊桓舉義兵。北當戎與狄。南艾荆及羣舒。天下無敢禦之。

右諸侯相征伐

陟岵序孝子行役思念父母也。國迫而數侵削役

乎大國。父母兄弟離散而作是詩也。箋云役乎大國者爲大國所徵發。

上慎旃哉。箋云上者謂在軍事作部列時。

采菽序刺幽王也。侮慢諸侯。諸侯來朝不能錫命以禮。數徵會之而無信義。君子見微而思古焉。箋幽王徵會諸侯爲合義兵。征伐有罪。旣往而無之。是于義事不信也。

右徵師

揚之水。序刺平王也。不撫其民而遠屯戍于母家。



周人怨思焉。箋平王母家申國在陳鄭之南迫近強楚王室微弱而數見侵伐王是以戍之。

采薇遣戍役也。文王之時西有昆夷之患北有玁狁之難以天子之命命將帥遣戍役以守衛中國故歌采薇以遣之出軍以勞還扶杜以勤歸也。

采薇采薇薇亦作止曰歸曰歸歲亦莫止。箋云西伯將遣戍役先與之期以采薇之時今薇生矣先輩可以行也。重言采薇者丁寧行期也。莫晚也。曰女何時歸乎亦歲晚之時乃得歸也。又丁寧歸期。

定其心也

正義云首章二月下旬遣三章三月上旬遣三章三月中旬遣又云月令云仲春之月無作大事孟秋乃命將帥不待孟秋而仲春遣兵者以患難既逼不暇待秋故也又云師出不踰時而文王過之者聖人觀敵強弱臨事制宜撫巡以道雖久不困高宗之伐鬼方周公之征四國皆三年乃歸文王之於此行歲暮始反人無怨言故載以爲法

豈敢定居一月三捷傳捷勝也箋往則庶乎一月之中三有勝功謂侵也伐也戰也

出車序勞還率也箋云遣將率及戍役同歌同時欲其同心也反而勞之異歌異日殊尊卑也禮記

日賜君子小人不同日此其義也

我出我車于彼牧矣箋云上我我殷王也下我將率自謂也西伯以天子之命出我戎車于所牧之地將使我出征伐

王命南仲往城于方箋云王使南仲爲將率往築城于朔方爲軍壘以禦北狄之難

執訊獲醜薄言還歸箋執其可言問所獲之衆以歸者當獻之也

杕杜序勞還役也箋役戍役也

右屯戍

桓序講武類禡也桓武志也

右講武

公劉其軍三單度其隰原徹田爲糧傳三單相襲也箋云邠后稷上公之封大國之制三軍之數單者無羨卒也度其隰與原田之多少徹之使出稅以爲國用什一而稅謂之徹魯哀公曰二吾猶不足如之何其徹也

正義云毛意以爲其在道也分老弱婦女爲三等之陳而兼營之鄭以爲至幽治軍之法

右治軍

附軍器

伯兮伯也執殳傳殳長丈二而無刃箋云兵車六等軫也戈也人也殳也車戟也酋矛也皆以四尺爲差

正義云考工記云殳長尋有四尺尋八尺又加四尺是丈二也治氏爲戈戟之刃不言殳刃是無刃也考工記注云戈殳戟矛皆插車轆此云執之者在車當插用則執之此据用以言也

清人二矛重英河上乎翺翺傳重英矛有英飾也

箋云二矛酋矛夷矛也各有畫飾

正義云考工記云酋矛常有四尺夷矛三尋注云八尺曰尋倍尋曰常酋夷長短名也酋短夷也長也

二矛重喬河上乎逍遙傳重喬累荷也箋云喬矛矜近上及室題所以縣毛羽

小戎龍盾之合傳龍盾畫龍其盾也

餞駟孔羣凸矛鎡錞蒙伐有苑傳凸三隅矛也錞鎡也蒙討羽也伐中干也苑文貌箋云蒙龐也討雜也畫雜羽之文于伐故曰龐伐

無衣修我戈矛傳戈長六尺六寸矛長二丈

正義云戈長六尺六寸考工記廬人文矛長二丈謂酋矛也

修我矛戟箋云戟車戟常也

正義云車戟常考工記廬人文常長丈六

皇矣以爾鉤援與爾臨衝以伐崇墉傳鉤鉤梯也所以鉤引上城者臨臨車也衝衝車也墉城也

正義云鉤援一物正謂梯也以梯倚城相鉤引而上援卽引也故云鉤鉤梯所以鉤引上城者墨子稱公輸般作雲梯以攻宋蓋此之謂也臨者在上臨下之名衝者從旁衝突之稱故知二車不同兵書有作臨車衝車之法墨子有備衝之篇知臨衝俱是車也

公劉干戈戚揚傳戚斧也揚鉞也箋云干盾也戈

句子戟也。

正義云廣雅云鉞戚斧也則戚揚皆斧鉞之別名傳以戚爲斧以揚爲鉞鉞大而斧小太公六韜云大阿斧重八斤一名天鉞是鉞大于斧也。

閼宮朱英綠滕二矛重弓。傳朱英矛飾也滕繩也。重弓重于鬯中也。箋云二矛重弓備折壞也。兵車之法左人持弓右人持矛中人御。

貝胄朱綬。傳貝胄貝飾也朱綬以朱綬綴之。

長發武王載旆有虔秉鉞。



毛詩禮徵卷第四終

受業姪家起校字